

琴

隱

園

詩

集

琴隱園詩集卷二十三

武進 湯貽汾 雨生

琴隱集

戊戌年六十一

題畫

爲探梅花賀歲來南山先比北山開柴門相送不覺晚滿  
地白雲如雪堆

名紙朝來一束空銜杯輸與閉門翁兒曹各盡新年興爆  
竹勿驚長耳公

題畫梅寄汪孟慈喜孫戶部卽次憶梅見寄韻

仙庵展散野雲寒嘗偕探梅夢裏知君跨鶴看不是龍山

種梅叟一枝誰與寄長安

師禹門太守雲臺紀游圖

天下名山五千三百有七十我生好游盡登躡朝探青邱  
暮丹穴千里萬里憑此神魂接雲臺之山大海上古時夢  
游醒旋忘披圖忽見臥雲龍西嶺有臥松最奇古愧我塵容對仙嶂  
一十二人五故知名游何故無佳詩金蟬島下蜃樓變別  
後珊瑚茁幾枝謂呂叔訥錢梅溪王仲瞿汪樊桐與禹門也

鷹游拯溺行爲禹門作

鷹游山高一千八十丈猿猱膽落不能上連東連西烟霧  
連自古無人關榛莽颶風忽挾海帆入攀木緣藤呼救急  
二十三人其號泣埃卒走告官官急來相援其船頭銳腹

則寬其人椎髻冠黃冠。一翁禮貌恭。言語苦不通。授以筆  
札書粗工。乃知翁是琉球八品職。戍入重山代歸國。天吳  
夜鬪飢蛟窟。舵折檣摧行不得。二十三人其拜官。官視其  
狀心惻然。掃除賓館急授餐。好官豈惜囊中錢。晨夕相依  
快游讌。樂且忘歸別猶戀。聖主懷柔一德心。海波無此  
深情深。二十三人歸其說。海外家家頌生佛。眼前拯溺復  
何人。世上風濤無盡日。

胸陽程氏得古鏡於先壘。緋綠色有雙鸞而無款識。  
不知何代物也。繪圖徵詩。裒然成集。予亦繼聲。

咸陽宮中燭腸冑。望蟾閣上窮魑魅。古鑑同爭日月光。神  
物如何能久晦。赫連城壞綠衣迷。瓊粉金膏恨六朝。磨洗

何曾逢負局東風寒食泣韓皋傷心一卷仙銅傳憔悴芙蓉人不見顰囊玉篋莫輕開還照雙鸞赴霄漢

嚴敬村聽鶯卷子

春游何處不聞鶯春思渾如春水生莫便王孫怨芳草催歸無此好春聲

黃陵廟裏鷓鴣飛一曲誰聞金縷衣記取江南春買處桃花人面臘雙扉

題畫梅贈孫柳君變孝廉

空山自喜清無伴高士如今更有誰難得詩人尋到此梅花開落已多時

贈琴師武聽梧

荒庭風葉靜去雁一何遲誰識幽人意悠然獨坐時千秋  
廣陵散百尺鳳凰枝枳棘紛當路空山與子期

貞友新闢小齋作歌索和次韻

三年息影春溪曲老樹當門山對屋移家但賸書五車送  
老惟憑酒千斛一笑頭顱雪不饒衰慵僅有詩情豪醉中  
一掃千匹絹惡書並辱紅絲硯握管公然榜鬱金朱闌翠  
幕張幽琴一琴七硯舫額子所書也故人林下百無一君獨歸栖貧立  
壁君不見裴公歸營綠野堂不聞豪麗師阿房一身偃息  
惟匡牀臺榭枉擲千金囊壺中天地不厭小況復香凝錦  
瑟旁花一籬蔬數畦月可借風可支謝公留得古山色與  
君不用移文移佳兒佳婦硯旁侍一庭和氣充門楣豈似

牽舟窮落拓。行看突兀溪南閣。樂哉宦海風帆收。身閒合  
臥百尺樓。不然與子共泛滄溟舟。遙從琴高赤鯉蓬壺游。  
天風鞚轡相賡酬。鸞龍高下同吟謳。浮沈不數驚與鷗。鳴  
呼百年鼎鼎更有底。處容句留。愛君襟懷真澹蕩。夢醒黃  
山絳紗帳。衡門相望長相親。且祝洛社年年老無恙。

鄧湘皋

顯鶴

松園聽雨圖

君年六十猶有兄。我未五十已無弟。吾弟孤羈瘴鄉死。爲  
助兄貧求祿米。廣廈空思庇路人。布衾難共連枝體。君不  
見松蔭堂弟兄。顏比蒼松蒼至今。促剗松間窗。

松園雅集圖者。湘皋兄雲渠六十初度。湘皋集其戚  
友爲壽作此。越五六年。湘皋來江南。索詩漫題。

不誦大洞經不服雲母屑白日耕田夜讀書此翁筋骨強  
於鐵此翁壽似松園松多年欲化青天龍翁莫騎龍棄家  
去松園歲歲須觴翁阿弟今年走千里百花沽去丹砂紅  
翁當日日作生日不必坐待風飄桐七月生日醉鄉自佳豈勞  
勸鄧旦固是欺孩童

南村耦耕圖爲湘泉兄弟作

落拓龍山子飢驅四十年去官仍作客除硯更無田不見  
南村叟躬耕資水邊書聲常隴畔白髮喜隨肩

畫梅寄嶺南故人

一枝何處寄瓊瑤清夢猶煩東閣招難忘年時身入畫梅  
關策馬正春朝



懷友

一片吟魂落葉輕。夜烏啼徹瑣闌清。當年辛苦誰知得。祇有西泠舊月明。  
夢斷蕭家寺裏鐘。分明詩境六橋蹤。舉頭落日紅如錦。只在江南紗帽峯。

麟見亭河帥放鼉圖

靈鼉獲自長淮濱。放入雙峰老龍窟。海水倒立雲霧開。噴  
喻波心一輪月。逢逢大鼓椎轅門。脫汝刀俎非常恩。石簿  
峰接金山渡。至此周旋亦何故。異哉鼉老能通神。前身或  
是郭景純。回頭獨學江豚拜。難忘使君恩德大。使君治河  
萬命懸。昆蟲草木皆生全。區區報恩豈汝責。蛇珠雀環有

何益但語魚龍蛟蜃知江湖永使風濤息

又題放牛圖

庖丁縛牛絀忽斷里巷東西牛亂竄市人走避兒童驚牛  
何之兮牛求生轆門朝啟百官集兵衛森嚴牛直入牛不  
能言但涕泣門外有屠執刀立答屠活牛牛值償黔人具  
道公慈祥放牛猶慮園囿小淵草蒙茸翠屏名山竊豈公悟  
微瀉山禪生佛非關戎乘傳驀鼻堪嗤石鞏牧名鰲鯨不殊  
屠机肉披圖卽此見公仁放鼉又是放牛人嗚呼一物之  
微尙如此何況江淮千萬民

六舟以畫豕索題

於泥不于同疲癯誰能知汝貳與縱殘杯冷炙腹不空貪

焚得無嗤伯封長喙參軍或號龍何爲臥此圈半弓回頭  
不見公孫宏頭白曷不歸遼東雲堂忽見圖屏風居然低  
眉佛子容屠刀放下欣相逢長生不入糟糠中

書吳門志隱錄

我昔罷鎮游吳城耳中卽聞顧子名

顧默庵名震濤

顧子才高無

不有一寸兔毫不離手遺賢隱士人安知核其行事備錄  
之積久漸成書幾冊心血乾枯鬚髮白我今展卷心暢然  
賢豪非此何能傳闡幽遠勝豆棚話十萬陰魂燈下拜

題贈西華道院馬煉師

有孝名

流水當門石氣清長生焉用采松苓春暉寸草何由報不

讀南華讀孝經

沈孝婦

孝婦鄧氏泗州沈朝選妻割股療翁者再翁年八十餘病思食肝婦割腹取肝羹仍療翁

竟死

泗有老病翁倉扁窮乏術易簣迫須臾孝婦肝腸裂抽刀  
割臂肉調羹勸翁啜純孝格天心沈疴忽焉失數年疾復  
作婦肉仍前割翁健轉逾常不知何藥物誰能長不死翁  
年已登耄呻吟索豬肝欲食不能咽孝婦忘其身袖中七  
首出長跪告天神吾肝療翁疾腹開肝在手霏霏刀縷切  
流血如奔泉傷哉婦命絕孝名播閭里聞者怪擣舌惜乎  
女子身不然希世傑昌黎荀鄠人末俗藉口實趙苞溫嶠  
流敢與匹夫匹肺肝得無異直愧鬢眉列 聖代民風淳  
孝弟婦孺述作詩貽采風芳徽終不滅

何孝子

孝子爲光字宜潛吳人父病腹職久不渡孝子以麥莖入竅吮之而渡沈歸思先生有傳

世間孝行那有此麥莖吸溺父不死翳何人兮何孝子君不見惜癰有難色嘗糞何甘心從來至孝由衷忱區區方寸格天地安在禳禱同蒼稊嗚呼孝子於今亦不死何人不知何孝子

吳西林明府赤嵌從軍圖

鯤身鹿耳險如何羽檄雷霆駭鸛鷺忽報賊來談笑視知君平日讀書多

長鯨擁浪陣雲高露布書成血染袍聚米拔山同袖手一枝健筆勝弓刀

鏡唱重翻放鴨兒海天一碧滌金卮輕將萬里秋閨夢換

取。弓。衣。幼。婦。詞。

極目扶桑日似鉦。孤兒心膽照分明。半生不盡悲親淚。化作滄溟洗甲兵。

韓履卿 崇大使白雲無盡圖

由來至樂是天倫。捧檄無非爲養親。只飲明湖一杯水。有誰似此養親人。

一日親歸便挂冠。倚間那得子心安。白雲本是山中物。爲底偏從此外看。

有幾斑衣羨老萊。功名多少絕裾來。世間無限看雲眼。也把頭顱看鏡臺。

見亭河帥太常仙蜨圖

圖爲金蘭畦

光梯

尙書見仙蜨集於京寓馬櫻花

下而作潭溪學士有題句自注云乾隆戊寅冬介  
楚園少宗伯攝太常事以仙蜨圖屬同人題咏云  
云圖後歸王西伯觀察轉貽河帥河帥官中書時  
薇垣見之且至其第又至河南開歸道署又再至  
袁浦節署消宴園

海山毓靈異栩栩通乎仙出則爲世瑞順應依官懸顧茲  
筍簾旁豈同羅綺前若非天人流詎有地主緣公于老道  
士幾歲勤周旋浮邱固可挹不離襟袖邊昔聞葛仙衣脫  
蛸飛翩翩今看一品服亦是仙衣鮮神仙富貴齊變幻皆  
雲煙此非韓憑魂不藉滕王傳偶因學士詩得識清卿賢

回頭合歡處。代謝殊悽然。故紙亦蓬轉。佚事猶絲牽。千秋  
乃屬公有此筆。如椽金隄出。榮光紀績河。清年鼓鐘叶。美  
頌雅奏亦可宣。還見遶遶來。怡情仍管絃。

春日過均之故居偕蔡友石太僕

寂寞青溪舊板橋。小樓鶯燕自昏朝。亂山三面目千里。流  
水半城家。六朝生計不多。惟種樹好詩無稿。盡書蕉。那堪  
二仲尋荒徑。風雨空天老鶴招。

琴隱園卽事

懶筇無意逐晴郊。新結龍山一把茅。遠岫青來明鏡裏。小  
樓紅出杏花梢。管絃聲靜金樽滿。鸚鵡廊深玉樹交。客至  
不應苛禮數。惠文冠已七年拋。



童孫

祿兒之長子世倬

種樹三年閣檻齊。童孫笑比菊枝低。也知揖客迎花徑。偏愛觀魚逐柳隄。慧已一心耽筆硯。壯期多力把鋤犁。風塵切莫而翁學。六十才容半畝栖。

題畫送祁春浦

鶴藻

侍郎

山翠晴逾溼。泉流亂亦清。天風吹墨雨。萬壑一齊鳴。紅到江南樹。愁從句裏生。送君秋一片。攜出石頭城。

秋日過屈子祠贈主僧耕生兼懷包慎伯大令

獨立秋風醉眼開。水仙宮觀水雲隈。幽花半吐蝶先見。老柳一疏蟬不來。儲酒待人招近局。看山爲客作高臺。夕陽誰其溪橋步。籠壁難忘製錦才。

顧夢薌玉山分築圖

界溪吟倦又商谿。金粟才名世罕齊。散盡黃金贖完璞。子孫猶自樂高棲。  
金粟山人有印曰玉山完璞晚年視天下將亂散盡家財隱於吳興之商溪得全其身遂號完璞印後歸竹痴道人

萬卷羅胸筆有神。畫師慧業自前身。青山當戶花圍屋。粉本原來勝別人。

胡蘭川

鍾

太守書畫遺卷爲公子曲江

潔

贊府題

書畫兼工得幾人。胸中不許着纖塵。荆關放下追歐柳。采筆原來最苦辛。

玉軸金匱手澤存。回頭問絹淚常吞。傳家片紙徵清德。那有簫金遺子孫。

又題畫卷

鏡波風細山光淨。牧笛魚榔靜。堪聽荒村茅屋簇雲堆。遠渚孤帆破烟暝。蘭川先生工繪事。此畫年才二十四。手澤流傳七十秋。子孫賢孝勝公侯。不惜金錢買故紙。此畫不亡君不死。君不死。豈在此。此特君餘事耳。君不見俎豆千

秋列青史

君祀鄉賢

吳松巖太守射獵遺照爲其曾孫向亭參軍作

凋戈羽騎鳴空谷。細網高罝四山伏。長圍蹴踏元雲平。山魃潛形偃鬼哭。太守農閒試講武。颯爽英姿勇堪賈。星狼月兔敢遁逃。草枯葉脫風蕭蕭。絃聲霹靂馬蹄急。血洒平蕪錦袍溼。掃除毒害去荆榛。太守豈真愛田獵。當年德政

適龔黃。比戶安樂勤耕桑。猛虎渡河鹿夾轂。至今部屋思  
循良。天心福善本至理。後世簪纓耀閭里。卽今三鳳競飛  
騰。萬石家聲誰其比。倦翮投林急景催。畫圖讀罷重低徊。  
雄心此日銷除盡。誰識南山射虎來。

天平玉佛歌爲六舟作

六舟游新安得白玉四面佛於廢寺。銘曰：天平四  
年六十日。靳逢受安成兄弟造。云云可辨者六十  
三字。

天平四年六十日。逢受安成造玉佛。如來說法獅象馴。文  
殊普賢左右列。其餘三佛八菩薩。四面裝嚴製精絕。上爲  
七世下見存。願願從心如意吉。五明鄰閭金仙窟。五明蔽  
寺名

戶蠨蛸鐘鼓歇一朝忽到滄浪僧再拜摩挲歎奇物初疑

遠自獅國來

晉義熙中獅子國獻玉佛

又疑早自滎陽失

唐高祖嘗刻玉佛於滎陽

僧寺爲太宗祈年

濡毫娓娓三千言懊恨當年不書月六十日當

二月晦否則偶然書闕佚是時佛法徧中國萬姓一心參

寂滅揮金如土亦堪憐日日鑿山還鑄鐵南北君臣盡塵

土山河宮觀悲薇蕨不成玉碎亦幸耳況復千年塵劫脫

得佛人應造佛人理或宜然豈臆說君非佞佛實好古往

往奇緣無意出牀頭五百六朝人佳石森羅費稽述君雖

好古人好貨只恐頑僧思玉竊綠天之外築一室玉佛同

龍心願畢

六舟居小綠天庵擬築玉佛庵

十月廿九日琴隱園集孫尹圃瞿秩山侯青甫熊松

喬劉焯齋任階平沈禮田蔡友石方雲室作十老

第一會申五簋約

穿林喜接十枝筇畫卷當窗展碧峯笑我眼迷三里霧知  
誰身健六朝松酒人屈指風飄藥謂古餘益齋可石竹嶼諸老往事回  
頭夢覺鐘五簋休嫌太寒儉白頭忍不數相逢

齒序欣隨九老肩醉中還當綠衣年便論風雅吾甘後似  
飲屠蘇少台先操翰莫非鴻印雪消寒難得菊當筵安排  
自戰開堅壁直過探梅訪戴天

畫菜貽孟棠太守

抱甕辛勤亦可憐桔槔聲裏歲時遷世間多少英雄業收  
拾荒籬斷井邊

知君心比玉壺清。齏粥何曾羨大烹。幾處棠郊遺厚澤。斷無此色到蒼生。

檀橋老屋鳳臺東。雨甲烟苗地幾弓。調鼎歸來看綠野。不妨宰相住山中。

凌雲閣望鐘山懷白雲寺僧普度兼柬龍山香城長老

山色當窗日夕佳。鐘山早暮紫翠不同巖扉松徑畫屏排。期君賣藥過塵市。爲我攜雲到小齋。方外交便麋鹿性。老來人畏鷺鷥儕。隔林更愛憑虛閣。龍山名叟除了烟霞不挂懷。

林兒經歲無書作。詩寄之。

得失莫非命。艱難好自持。

補官賀縣格於部議擇交初識際。知過未

萌時雁盡無書到吾衰豈爾知貧餘一硯在早報育麟兒

凌雲閣寒坐懷孫月坡

時客授查氏

小閣閒憑見句遲別君忽到惜春時禁冬樹比辭榮客鬧  
晚鴉同放學兒一月游歸荒我徑半生心苦寄人籬樓臺  
七寶貧如洗誰唱黃河遠上詞

月坡工詞

散步至雞鳴寺前偶懷六舟

負手吟探隔澗梅石頭路積古時苔半山紅葉出城去滿  
地白雲如水來歲移沿門動簾鼓境幽無佛不樓臺未知  
白足滄浪客能否衝寒早渡杯

六舟有約過予

秋日園居

金粟飄殘菊節催恩恩霜雪滿頭堆夢中得句多忘續病



裏郵書半未開三徑雲封游屐斷一庭葉落塞鴻來尋秋  
豈少知音侶自愛孤吟覆酒杯

吳興不得見銅士晤鈕璠圃頽然老矣

極目北山北維舟西塞西思君頭已白到此手難攜再至  
愁滄海空來笑剡溪昔年酩酊處童子已扶藜

吳興弔端木鶴田國瑞中翰

不記青田鶴同探雪嶺梅

予攝鎮吳興嘗借西庵探梅

停舟秋水咽訪

舊我心哀冠爲懷人挂

君去官後卽訪友吳興

魂猶講易來

君教諭歸安時

名其堂曰易堂

如何三尺土埋得此奇才

君卒於遂昌家以其喪來葬

昔日長安去

綸章九股頒除官酬白髮伏

闕獻青山

君奉地稱

詔相萬年吉

賓客壺觴盛公侯縞紵攀青蠅俱不

見老淚獨潛潛

晤周繫山桂廣文別後舟中卻寄兼懷奚榆樓

叩門君何在扶病我重來。一載歸寧盡扁舟。一夢回瀟湘。柳月冷成。每入秋哀。不見方山。予空傾下若杯。處士自號方屏山樵時客吳門未歸

青溪伯神曲。

青溪小姑祠久廢義當復因作迎神送神之曲俟報賽者歌以侑焉

青溪之水清潏潏小姑何許兮雲漫漫金玉其身兮冰雪其心神翱翔乎天之上兮形乃入乎淵深擷芳蘭兮采芙蓉迎小姑兮青溪之東刑丹雞兮灼元龜迎小姑兮青溪

之西潔羹醴兮豐黍稷鐘鼓作兮魚龍寂迎小姑兮青溪  
之南青溪之北

右迎神

青溪之水清萬古小姑來兮從二女動霧縠兮迴明璫綽  
奇麗兮蘭茝芳游非洛兮居非湘嗟獨處兮禮自防旌容  
容般從從靈祀祀翔鸞龍翔鸞龍刷八鴻騎亭峩峩伯之  
宮歸叔姬兮壘篴從維忠與貞兮曼世崇鯁竿粥粥樂旣  
終吾士與女兮福無窮

右送神

瓢兒菜

淡泊平生志無心戀鼎烹儒餐憐菽乳鄉味奪莼羹癖嗜  
詩頻探新嘗酒快傾幾經霜雪鍊老圃慶功成

菰薤慚虛譽田園此味真休嫌咬菜儉卻稱飲瓢貧知爾

歲寒性難謀。肉食人芳華。愁歎絕壘甕。肯相親。

### 黃梅花

酒鑪西畔夕陽亭。臘鼓催開。展漫停守口。須堅期耐久。素心難得畏飄零。妝臺簪並釵。光豔綸開調。添鼎味。馨拋擲。殘年憐覆水。一枝好。自護金鈴。

### 祈雪詞

誰將米價問江東。野老垂頭怨嬾龍。豐歉不關租吏事。君恩一樣祿千鍾。

金貂典去著黃縣。健飯翻愁雙鑠年。歲稔也知飢不免。歸耕除硯更無田。

鹿巾鶴氅醉婆娑。待和尖叉北壁歌。好仗聚星堂上客。齊

聲呼起薛延陀

拾取松枝喚煮茶。西園樓閣半雲遮。梅梢一榻宜高士。快  
看仙人翦水花。

紫宸減膳赤章齋。太乙宮排瑟瑟儀。

時京師祈雪。上命  
光明殿道衆設壇大

高殿不用昆明飛輦術。九重心事有天知。

鳳蓋龍幡格百神。歡歌三白太平春。衰翁世事關懷少。

聖代憂民自有人。

海客琴尊圖爲張甥仲遠曜孫作。

落花飛絮斜陽路。馬足車塵春易去。不是呼朋共酒尊。一  
腔愁思無消處。幾處林亭銷碧烟。居鄰猶識舊平泉。主人  
有酒歡今夕。客亦橫琴緩拂絃。絃中古調何人識。四座傾

心同默默誰是航琛海上來詩成快似鯢鵬擊琴聲漸歇  
鶯聲起高會百年能有幾萬里萍蹤九陌塵相逢何幸成  
知己一朝綺陌輕分手車笠盟言情獨厚何日牽衣續舊  
歡不堪客舍重回首六朝山色迎雙屐歎息琴尊暮雲隔  
紙上樓臺有夢隨道旁楊柳無人憶讀畫因君淚似潮長  
安舊雨盡蕭條酒痕襟上模糊認腸斷

先皇舊賜袍

余伴

暹羅使臣入貢蒙

賜緋袍一襲

琴隱園詩集卷二十三終

琴隱園詩集卷二十四

武進 湯貽汾 雨生

琴隱集

己亥 年六十二

消寒第四會侯青甫蔡友石汪鄴樓浦懋田馮晉魚

集琴隱園登凌雲閣予得登字情田凌字韻詩先

成犯登字卽次其韻

冷香紅雪推齊名

予居本王菊莊先生冷香山館先生爲  
蔣心餘先生友心餘紅雪樓在東倉橋

今屬

馬氏雲烟變滅倏廢興兩翁仙去四十載小倉以外無林

亭此地當年冷香主小倉紅雪皆吟朋我來問字每日肝

苦階鶴睡聞書聲頗商竹外置一閣看山對月同吟登豈

知錦繡忽塵土遂使門戶寒冰凌半山僥倖謝公替屋角  
賸有嵐光凝翳志吾成亦偶爾眼中突兀青雲層晴日南  
榮送春煥清風北牖祛炎蒸千峰排闥百花擁福地何必  
求金庭庭前鶯燕得我侶傲睨俗客殊驕矜羣公山林喜  
同調攜琴暇日常來經有酒卽飲有詩和敦梓不過山穀  
馨當門古樹舊相識對此毋乃悲先零騷壇何人執牛耳  
我慚藜藿空腸撐詩成不足覆君瓿羨君詩筆真瓏玲情田  
詩名玉瓏玲館集我曹歲事翰墨耳并此廢置非人情是會諸公未有詩

新年梅開索新句不須懷刺徒勞形

建康古井歌題并天翁十一井欄拓本

何容并創天監時商旅渴乏帝愍之茅山道士奉詔爲井



十有五獨此遺

題曰梁天監十五年太歲丙申 皇帝愍商旅之渴乏乃詔茅山道士口口永若作

亭及井深陽舊亦隸建康有井傳自元和唐沙門作讚供

法王九十一字廿一行儲卿郭通名姓彰

題曰維唐元和六年歲次辛卯

五月甲午朔十五日戊申沙門澄觀為零陵寺造常住石

井欄并石盆永充供養大匠儲卿郭通偈讚曰此是南山

石將來造井欄留傳于萬代各結佛家緣盡意修功德應

無朽壤年同霑賤福者超于彌勒前寶刻類編澄觀嘗書

棲霞律泰和井題蔣詮捨三山門前古蘭若唐欺晉欺識

大師碑者寡三山門外普惠寺於嘉慶廿四年災寺僧掘地得此

行三月吉日按魏曹胤晉廢帝魏高祖後趙石勒漢李勢

皆號太和唐文宗吳楊溥皆號大和太泰通用此不知

何代北門義井字深刻紀年下元時代匿紛紛篡竊悲南

北一月門橋道旁題義井二大字左一行題下元壬午年十

西塔基記為唐下元戊午七月此豈同其宋玉兔泉玉筋

例邪然此并不書國號時無定君故邪

工字形半泐縣學宮玉兔二字篆文不完相傳為秦檜書景定志言井在學宮左廡內今在江

甯縣學大門內之廡牆外淳熙丙午邵永堅建普生泉今

瞻園井在藩署瞻園題普生泉三大字對面題兩行淳熙

作石獅子壓其上題螺絲灣頭兩義泉嘉泰寶慶同清漣

名八字遂為所掩諸軍都壕嘉泰官三年五月監造完銘辭娓娓雅可觀

面字刻三方一題義泉二大字義字蝕一銘辭云鑿數山

足其泉如玉匪江斯流泄寶幽谷神物護藏天機感觸泥

澤之腸以浼以沃一題年號官名云大宋嘉泰三寶慶丁

亥夏庚申日荀氏拾義鄉泉一十五字半不全欄破裂字

大字曰荀氏拾義鄉泉九小字曰寶慶歲丁亥夏庚申日

寶字賴存末筆丁亥蓋三年也此與嘉泰井東西並峙嘉

泰見于著錄此華嚴樓畔咸淳井比邱福基題字整嚴寺

則鮮有知者門旁字二行曰咸淳二年因口建

石橋置此口監莊比邱福基立胭脂巷近鳳凰臺來鳳

泉疑李監題

欄五方一面刻三篆字存上  
下來泉二字中鑿穿尙存末數筆類鳳字篆法似李陽冰

德恩最遲至正鑿雷山大書秉義作

欄六方環刻雷山義泉四大篆一方題篆

二行

云至正戊子雷秉義建雷山志乘失載惟劉純之存徵錄云宋丞相李迪題江南義井三雷山其一則雷山當

別有宋井或此井自宋屬雷氏至元而其裔重建石闌邪秉義爲元翰林待制楊剛中門人嘗爲剛中刊霜月齋集

見金此十一井同鄉土誰訪得之陳仲虎井丹一刺不投陵志

人蘭足胡爲轆轤苦有井水處君皆知世上無人耽汲古

古井千秋上下天天雖一規輪快觀此卷當騰五色雲江

鄉豈但圖經補君不聞崑崙九井神仙都玉欄金榦濺明

珠更挽天河洗眸子看取仙人上古書

贈羅茗香

士琳

世間怪事無不有鳳凰飛入羅含口吳山一別近十年有

口但吸湘江煙雪後梅花滿荒徑曉屏剝啄山禽應相見  
須髻驚老蒼芙蓉鏡下參行藏與君且酌金陵酒莫向宜  
春怨屠狗早晚相逢問使君青龍飛去同攜手

金世祿西湖生壙圖

湖山如此忍輕拋七十頭顱歎繫匏不若生前尋樂地先  
營一把蓋頭茅

驢背忽忽輕雪侵六橋詩夢渺難尋空山風雨苔千碣媿  
負當年廣廈心

予嘗置義塚  
四區於杭州

千秋一齒閉神光

予嘗瘞落齒于  
興甯縣神光山

野鶴寒猿枉斷腸豈料

醉侯還獨醒糟邱難築白雲鄉

斲破松顛杖底雲捫碑誰道是疑文蹉跎恐被頑仙占一

臥千年再讓君

太行高爲馬藏山茂才作

太行高不可見骨肉東西音信斷親亡乃得返故鄉腸如

車輪淚如轍

解一

太行高不可踰兄弟泣涕同登車黃河滔

天弟先渡不知阿兄喪中途

解二

太行高望兄處斷雁哀鳴

葉辭樹去時同車返獨步葬兄重循去時路

解三

事親不得

願事兄事兄不得願事嫂未亡亦亡痛懷抱慰親慰兄重

襁褓嗚呼事親克孝自友恭誰無兄弟斯可風

解四

麟溪歸釣歌爲周石藩

際華

大令作

男兒墮地志四方白頭誰不思還鄉宦游萬里亦云壯掉

頭始厭江湖長麟溪釣翁廡廟器釣鼇身手人驚異投竿

一出四十年名在儒林與循吏鱸魚雖美非鄉味收拾烟  
帆作歸計朝衫換取綠簑衣世上何人知此意蕭蕭蘆荻  
颭秋風茅舍鷗汀蟹岸通三十六陂明月白醉眠不記大  
江東江東父老難爲別別後雙魚愁斷絕臥轍傷心盡涸  
鱗十年共藉廉泉活

楊子憐江帆聽雨圖

舉頭渾不辨東西一幅襄陽畫絕奇妒殺春江花月夜玉  
簫金管送鴟夷

逝水光陰鬢雪多人間何處少風波蓼花磯畔漁竿穩肯  
把青衫換綠簑

蘇程門閥總衰微天上修文又陸機獨客情懷更何限夢

魂衝雨料難歸

半是歸舟半去舟箇中滋味各心頭不知斷雁西風恨可  
抵天寒倚竹愁

老去貧餘岸上船賺人清夢尙鷗邊浪花如雪留雙鬢風  
雨江湖四十年

忠孝祠落成敬識

茫茫碧海痛招魂俎豆鄉邦感國恩百世簪纓榮述德  
千秋史乘重旌門媿無涓滴酬君父悔把風塵誤子孫  
何日全家守鑪篆閉門常共一經溫

抵金陵東鴈巢

開蓬見石頭推枕不覺喜不是喜石頭人在石頭裏

金茂庭

橋

愛菊圖

此境豈非化幽棲亦偶然秋停茅屋畔詩出短籬邊佳日只宜酒青山不費錢看君腰折處惟有菊花前

九月二十日招同黃樹齋

爵茲

通政鈕松泉

福保

修

撰嚴問樵

保庸

太史孔宥函

繼錄

比部黃子湘

培

慶

上舍集憑虛閣作圖紀事卽席漫成

清游有夙緣風雨不能阻憑高襲秋氣葉聲亂人語臨風生古懽江山辨龍虎黃公柱石資立言震千古鈕子文章伯持衡其南土聞聲非一朝傾蓋如舊雨追隨二三子著述並徐庾盛世多畸人偶焉此賓主銜杯樂今夕空山少雞黍倦翮無雲程重逢在何許繪圖紀良會高歌悵南



浦

高麟洲小照

金陵山水窟幽棲必高士軒冕非不榮僕僕遠閭里何況  
饑驅人無殊漚穢子我愛高伯恭澹泊輕朱紫相賞松石  
閒心清若流水我有一把茅乃在半張紙宦游四十年老  
倦尙客此所恃觴咏豪不知歲月駛羨君不出戶生長煙  
霞裏抱膝聽松風世事不到耳念我素心人君姊婿何蕉衫常共  
君游止著作縱千秋風流長已矣因君一揮涕泉路無雙  
鯉蕉衫詩稿予已爲梓行

琴隱園盆梅得地成柯贈之以詩

梅性自縱橫如何受束縛欲置几席間不同在邱壑屈曲

由凡夫遇之得無虐意造非天成生趣嘆蕭索一朝桎梏  
去快若箴脫鶴不嫌榛莽欺且遂煙霞樂蒼松舊相識相  
憐月相謔從此葆天真年深氣盤礴

寄汪豆村

十年壇坫冷江東老嬾慚將姓氏通何日豆花棚下坐把  
君詩卷對秋風

雙笠君曾一笠逢綠波芳草去無蹤知君亦有相思句休

寄湘江寄蔣峯

保緒與予訂交作雙笠圖保緒已沒于楚君亦舊雨因以索題

周素夫

世錦養園圖

周郎寄我養園圖圖者陳侯

鍾

題者吳

蘭修

三人皆吾文

字友絕藝天成當不朽孰養園賓孰園主天地蘊廬一逆

旅蠻煙蛋雨幾春秋手種庭柯已如許南州尉老客湖歸  
陳廣文飢死悲空幃吳博得名園幾場醉開門獨讓青山  
來青山亦我舊相識曾把瑤琴入香國松風蘿月別多年  
此日知君同愛惜萍蹤到處堪爲家騷人從古癖煙霞十  
年養氣作詩虎漫養蠻娘媚瘠花我亦龍山結茅屋養病  
靜對平安竹榻來林下白頭多菊籬日日吟肩摩有圖那  
得君來讀新釀花前爲君漉

鐘寺紀緣圖

有記

鐘樓寺毘陵古刹也本名崇覺以鐘樓峻于他寺  
故又有此名云己亥夏予自白門歸里建忠孝祠  
暨先將軍旌孝坊重過其地回憶童時游迹已

越四十五年而四顧茫然如未嘗至者不知其廢而復創也主僧延予丈室問訊知久客始歸乃告以某年月日某之布施費以萬計惟大鐘鑄一再而不鳴樓且腐廢無如何也因請啟樓觀之予倦不能登仰視規製甚偉竊念鐘神物也古且有不叩自鳴者矣焉有叩而不鳴者邪使僧叩之覓杵不得以屢屢代果如其言使大叩之如故予愕然命從者曰若代吾叩必鳴從者執屨屢予凝神定志曰叩則大聲噌吰林屋皆震諸僧喜躍變色聞者畢至疑有神術予不自知其何以故也予時寓居廣濟侯廟之文光閣日夜聞此樓鐘聲過予者

必以問予漫應之曰佛家有因緣之說是亦所謂  
緣而已矣是秋還白門孫月坡茂才聞而作歌予  
戲和之惠子秋韶亦繼作二子謂宜紀以圖俾後  
世知粥翁佚事乃有鐘寺紀緣之圖

不鳴則已鳴驚人鐘樓寺鐘必有神少小離鄉歸白髮此  
鐘不是當年物杜蘅柴玉姓氏新受二千斛重萬鈞蛟龍  
夜愁山谷震力敵鯨魚不能奮閹黎抱鐘飢亂號撞破頭  
顧人莫問我時到寺日正中一樓扃固塵埃封蒲牢則瘖  
佛不聾勸僧竭力敲頑銅意誠從古感金石百萬金錢忍  
空擲不然飛去洪濤中未必歸來風雨夕更數百手如撞  
廷雷霆忽發銅山崩萬人堵集咸疑驚適從何來此老儂

一日喧傳徧城郭疑我前身大乘僧

宋紹興初興國縣大寺鐘失去爲天寶

寺所得叩之無聲大乘僧索之一叩卽鳴乃得載歸也

孫郎作歌詫奇事咄咄千言

神鬼悸世間萬事皆偶然其中或亦關因緣賤子無聊博  
游戲豈有回天神術異佛非無力假手我知我胸多不平  
氣升沈顯晦各有時不遇其人姑待之穆然語默兩不苟  
納納乾坤此我師吁嗟乎大夢紛紛醒誰早庸人轉厭鐘  
聲擾鐘既鳴寺僧乃日夕鳴之近里病家多咎鐘平生欲鳴君豈知一臥滄江  
十年老

隨園酒後踏月老梅下

與子一年別重隨明月來溪雲流曲徑竹露響空臺多病  
慵詩句消寒費酒杯玉山環佩寂殘夢幾株梅

月當頭日隨園集飲

當頭憐古月過眼歎浮雲此地推詩國今朝張酒軍花香  
雙袖納山色一杯分不敢酬高咏先慚野鶴聞

秋韶于琴隱園席上聽劍人緣逍遙巾曲有詩屬和  
此是荆湘筑茫茫孰賞音貽君數行淚寫我一悲吟尙有  
冲霄氣原無遁世心收場餘白髮空負酒杯深

酬秋韶見題畫梅樓圖

翠嶽當明鏡紅樓貯遠春一家梅作伴三徑水爲鄰月是  
琴相識仙應花後身多君詩筆豔重畫畫中人

題孫月坡小像

六朝雲物舊騷壇古調憑君老獨彈獬豸由來非識字鳳

鳳誰料慣號寒世無原孟悲書劍家近諸離重膽肝燕頤  
鳶肩同一瞬醉餘且把少微看

巖眉岑

福基

以所集古磚文寄示索題兼懷吳康甫

嗜古無人吉金少瓦礫胡爲珪璧寶東南屈指陳抱鈕章

王

樵

康甫六舟同一張

叔求石貌

支牀作竈盡古璧漢魏六朝

爭鑒藏龍城又有呂太史堯海國歸裝護慧苴八人悉我

金石交鬪奇不異崇愷豪一編奪日吁可怪更有何人爭

我輩塊璧在手千金輕眼中復有巖先生半拾荒墳半智

井高齋羅列堅書城古色凝煙土花凍破硯擲前驚五鳳

六書外有此奇書雖印精參已殊衆世間同調祇八友直

欲并吞八家有眞州

阮氏

壽春

孫氏

乃附庸我蝨其間更非偶



往歲吳生節倅錢博蒐遂欲窮雕鐫時代姓名一一箋發  
揮義蘊垂千年願君共志操丹鉛功侔歐趙無遷延一朝  
事業勒鐘鼎未必猶餘運甓閒

錢梅溪

詠

參軍年八十隱虞山石洞相傳爲太公望

所居見陸探微吳地記書來索詩卽題所著石室  
誌壽之

長春寺裏千秋菊二李

蘇市兵部芸甫工部

風流招近局輦下才人

盡識君八分一日償千幅舊侶金臺尙餘幾杏花春雨君  
歸矣窗前忽落虞山雲翦燭開檄拍案起萬里蹤停萬卷  
破萬樹梅花洞中臥長安卿相多白頭此洞誰能來設坐  
茂園花飛重握手松柏精神異蒲柳鵠峰霞氣在須眉換

骨金丹知鍊否豐碑大碣千秋蹟何異燕然著勳績閒來  
剗徧古苔紋時有仙人和題壁君竟希蹤赤松子墮落紅  
塵我如此搏沙踏雪怕回頭覆雨翻雲羞挂齒未有青山  
不好客郗超于頃今難得典盡琴書謝紱簪豈知老作青  
溪客青溪十老壺觴主君肩扁舟過煙浦相逢莫笑態龍  
鍾徒手猶能格詩虎夢中縮地居然易鹿苑鸞臺醒難記  
不曾偷得肉芝歸祇恐重來洞門閉洞口春雲暗花陽洞  
裏吟聲自朝暮清泉百道白龍飛此是太公棲隱處太公  
八十始出山君今久矣驅車還年年不肩昇天去爲著山  
經未得聞

庚子年六十三

題陳雪峰所藏唐陶山方伯方茶山廉訪張古餘孫

伯淵兩觀察遺翰合冊

憶昔金斗城同官愜鄉里

予權廬州都尉時左杏莊丈宰合肥

政閒觴咏多

聚筆來孫子

伯淵以修志居郡齋

談笑輒終朝雲烟動千紙茶山守

江州匡廬有草堂到門先拜石我句留空廊猿鶴成相思

塵埃汙兩梁

兩梁竟被塵埃汙唐韓致堯句

吉水逢張公安知後同社少

壯赴玉樓

謂王竹塹都轉

悽然俱淚下至今嘉會疏無人主風雅

名宦推唐公循聲徧江國我時結髮初隨牒江南北縞紵

雖未通同舟誼非隔四賢各千古白頭共青溪幽魂散鄰

笛遺迹消鴻泥後死得幾人殘箋什襲題芳馥私一嚮光

芒矜片羽四賢豈自知德星此焉聚佳哉獨抱廬能爲四

賢主人壽不如紙展卷能無悲勸君且勿悲豹死猶留皮  
官高何足貴所貴德與才雪窗呵手觀回首四十載眼中  
皆少年論交厭湖海掩卷且銜杯題詩我猶在

胡芑香嘗爲芝楣宮保寫小滄浪館雅集圖圖中數  
十人各肖其貌芑香與予父子皆與焉今芑香弔  
宮保於白門過園話舊愴焉有作

簪裾零落歎平津佳士東南賸寫真同是昔年投轄客難  
爲今日束芻人雀羅門外空悲角燕寢堂前又好春回首  
西州腸斷絕故交垂盡況雷陳

六舟示所佩黃神越章土質而鐵色抱朴入山佩黃  
神越章遇新虎迹以印順印之虎卽去逆印之虎

卽還卽此印歟

山君可驅亦可徠神越之印吁可怪六舟佩之五岳遊但  
逢毛女攜仙儔平生好道復嗜古有此蓬萊乾淨土知君  
視此亦鴻泥佛力本來能伏虎

題侯氏僮馮次蓮遺墨

芳魂猶在錦囊邊腸斷曇花劫後先抑庵自號曇花居士有與次蓮弈詩今  
日草堂人獨老等閒阿段八詩篇青浦有短檠歌兒能編籬種樹詩

慈恩寺佛像歌有序

劉燕亭觀察於長安慈恩寺雁塔下得唐造像七  
八背有文或全或缺全者文曰大唐善業泥厭得  
眞如妙色身十二字三行志稱寺本隋無漏寺故

址高宗在東宮日爲母文德皇后祈福出七宮亡  
者財帛建此訖於永徽二年題名雁塔卽此五季  
寺廢塔存宋熙甯元豐間塔一再火鄉人王正叔  
剡剗整甃得題名數十紙宣和二年大名柳瑋伯  
和出使咸陽所得尤富王正叔次成十卷刻於塔  
西南隅明萬厯間塔又火并宋刻亦不可得見此  
造像數字猶存初唐矩範吉光片羽可寶者也

善業泥噫吁嘻唐業移泥不知妙色身默于春厯亭屯淪  
風塵佛骨無靈況泥土石罍空傳永徽古懷仁元應不同  
工此十二字佛佛同無造作人無歲月曾見三唐題塔筆  
嘉樹婆娑猛獸馴蓮臺法座層層分鈴鉢幡幢左右執尊

者跣趺侍者立劉郎睹此重歎歎七宮財帛餘區區螭碑  
龜碣今何在王柳蒐奇劫火再誰非黃土爾獨存不壞原  
來遲我輩今日居然南渡江四百八寺歸蕭梁詩成擊鉢  
惟呈佛得意防人壓土囊

燕庭  
自詩

煙波放棹圖爲周溫甫作

舟楫平生志江湖滿地愁君方三躍鯉我已獨眠鷗花月  
鷗夷舸笙簫杜若洲少年東逝水掩卷怕回頭

贈客

束髮從戎萬里行白頭餘得氣縱橫孟公不過工投轄姓  
字何爲座客驚

鬢絲禪榻歎流年日日新詩草綠天聞道非煙環佩寂曉

鐘撞斷夢遊仙

陸香筠明經以其亡友寇坦之

麟趾

都尉秋咏索題

因憶嘉慶初予權江甯右都司坦之爲予屬官又  
與予友董窺園爲吟侶今右都司汰後公解犁爲

蔬圃振觸前塵拉雜成詠

野水荒畦四十秋  
娉娥獨憶舊南樓  
傷心細柳驕驄路  
聽罷銅鞮已白頭

秋雨秋風劇可憐  
秋人寂寞化秋煙  
窺園吟侶無多在  
誰記門前破虎羈

雷塘月白亂棲鴉  
畫角聲沈巷陌斜  
可有吟魂飛得到  
蓮花橋畔陸郎家



題魏滋伯翠浮閣圖卽以奉懷兼寄暖姝夫人

湖山頻入夢之子況心知何日翠浮閣來尋畫裏詩花梢  
人似玉屋角黛如眉莫唱柳絲曲風前雙淚垂

蘇芝舫

雲驥

自都中奉其尊人賓嶠吏部歸葬鄱陽

以予爲其大父礪溪元戎故交過訪白門因贈

蘇瓊孫子擅文章年少憐君苦備嘗三世論交身萬里一  
尊話舊淚千行人情久似江流淡書味應同歲序長努力  
承先知有志尤熊不獨爲青箱

寄懷張春水

澹上海

十年何計遣相思蠲疾時還把酒卮對月情懷秋蟀共看  
山蹤迹蹇驢知兵戈海國音書斷兒女燈窗涕淚滋舊雨

休懷嚴節度那無人愛杜陵詩

題沈咏樓菩提葉經一緡

本十餘葉蝕于蠹

風幡堂上舊春風一葉輕吹似轉蓬珍重蠅頭千點墨幾

回費卻畫眉工

嚴修能書多心經小印香修其姬人字也

補衲頭陀客見稀杜鵑聲裏綠陰肥海珠風月應無恙舊

侶傷心亂葉飛

海珠寺亦有菩提樹子嘗與李畏吾太守謝澧浦太史葉雲谷民部李芸甫水部張

墨池張南山兩孝廉集樹下作圖賦詩

脈望如何有佛緣吉光猶藉彩毫傳佛原非佛偈非偈孰

悟菩提非樹禪

憐君長物但區區似我羅浮一竹符我不成仙君不佛相

看多分太嫌孤

余遊羅浮得竹葉符一

葉梅癡再游滇黔歸示快游圖索題卽送還之江時

海上方用兵

雙鳥頻追萬里鴻  
名山都付錦囊中  
從今便合窮滄海  
直到樽桑始挂弓

小閣納涼偶懷祿兒

小閣雨餘開涼生  
水竹隈詩還先月  
得夢每待鐘催峰  
斷江雲起窗明塔  
火來林棲足幽賞  
襌襪幾時回

寄祿兒厯下

自汝擔簦別鯨鯢  
跋浪高長江斷行  
旅稚子習弓刀三  
月魚游釜干村樹  
不毛哀鴻思得食  
敢憚築城勞

時修石頭城

杞憂知不免辛苦  
莫還鄉歲勞鮒方  
涸年豐硯且荒阿  
兄

今海角多病尙戎行我自安藜藿爲留愛日長

綬兒自軍中病歸

憔悴忽如此從征那得歸半年撐病骨千里戀親闈長劍  
原無恙滄溟尙倒飛元戎知健飯羽扇未停揮

卽事

六朝佳麗地盜賊滿江郊苦雨循通棹驚雷屋出蛟過門  
喧羽檄入市黯蠨蛸不見巖棲客風狂又卷茅

成親王書桐紙蘭亭吳雲樵

芳培

少宰物也茹古香

藁

尙書嘗從借觀少宰慮爲所奪輒以詩先之尙

書和之一時名公卿和者殆徧越二十五年少宰

裔攜至江南索題因次其韻

平生嗜名翰邂逅目刮垢所乏臨池功古硯積塵厚蘭亭  
誰夢見魚目混已久莫辨褚薛虞徒爭湍帶右梁園富鴻  
祕藝苑輝先後真迹重琳琅巍然光照牖倡酬得兩公合  
此三不朽佳話亦稀聞繼聲況諸友桐紙罕更奇終愁缸  
面誘續貂我深愧含毫呼負負千金肯點頭三日不釋手

園居

祇爲尋鶯懶先教種柳多一庭妨旭日萬綠瀉晴波竹間  
高齊塔荆扉閉似螺此中我盤谷世事近如何

陸機平復帖真迹 成邸物祁春浦侍郎得其摹本

泐石以貽楊閑庵

秉杞

茂才閑庵以秋賦來金陵

屬題其後

八十三言點畫奇雲閒才子故多姿紛紛寇亂原無恙一

紙強於十萬師

寇亂子見帖中

多情重是美人貽燕瘦環肥各自宜

梁氏秋碧堂先有此刻稍瘦

待挽

銀河洗雙眼石渠珍祕一齊窺

王子梅

鴻

六舟合照

論交支許最忘形半芋分嘗眼獨青說法談詩俱第一空

山應有石頭聽

愛游亦似打包僧幾日滄浪醉不醒借問綠天無恙否我

疑蕭翼賺蘭亭

懷鐘山白雲寺僧普渡

雲多不見山雲少見山寺何日白雲僧攜雲花下至

許若秋墩園圖

百廉樓

程蘅衫樓名

上看江霞夢裏頻過程邈叔家又道叔元

精舍好幾時同坐墩園花

林下波連元武湖故侯江令宅俱蕪青溪雙閣留餘劫山

色堪供月旦無

日門水災大厦圯廢者無算侯青甫與子居向無水患青甫閣曰環勝子閣曰凌雲

君皆愛之

張甥仲遠比屋聯吟園

仲遠婦包孟提姊綸英嫁孫叔獻統英嫁黃季旭同居工

吟

杏梁桂柱摧斧斤三月江南樹巢鼠蜃樓忽散不復完通

德親仁渺煙渚紅軒碧砌花冥冥畫圖欣瞻堂四并一朝

星聚發光怪金石出戶鏗鏘鳴令嫻姊妹皆殊衆抱弟當

琴隱園詩集

卷二十四

七

年聽絃誦友壻聲華謝庾同博陵萬卷資吟諷若蘭才藻  
況稱奇鴻案聯吟比屋齊清漳南北輸風雅三徑羊求有  
別離今年榴大登科必轉瞬連鑣朝鳳闕陌頭柳色漫

相思歸馬如飛錦標奪龍山亦有三重茅鄰無康節堪相

招牀下波連元武

湖名

閣閣門但聽魚龍號病歸米鹽煩瑣

屑擲卻紅窗畫眉筆典琴鬻畫牘青山賣與松間古明月

夜深呼起細腰尋西壁安能有窖金一笑翟公門似水三

千賓客幾知心故侯江令餘空宅飛燕夕陽迷巷陌買鄰

只愛聽銀箏誰復垂楊其元白木樨香裏話離羣三尺生

綃展古春千載騷壇傳盛事同渠共竈六詩人

于鵠詩蒸  
梁常共竈

澆筵亦  
同渠



曹愷堂

秉仁

觀海圖

我昔乘風輕萬里，駭浪奔濤生足底。  
欲把長竿釣六鼇，不到崑崙心不已。  
自從老病謝賓客，十年不蠟游山屐。  
出門一步亦蹢躅，只愛在山泉不息。  
今朝見君觀海圖，筆墨變化神明驅。  
搏桑不知幾萬里，目窮不得心先趨。  
左執烏號右昆吾，我欲快把長鯨屠。  
魚龍百怪皆吾徒，君提桴鼓助我無。  
滄海茫茫渺一粟，肝膽誰知仰天哭。  
蓬島方壺安在哉，簿書豈是長生錄。  
幕府而今重異才，但將冷眼對深杯。  
汪洋其仰波千頃，誰識君嘗觀海來。

族子成烈自家來晤卽送之中州

吾宗七孝廉，食祿僅有二。吾子毀瘠餘，天涯憐襤被旅吟。

聲慘淒展卷滋清涕登高望嵩嶽知己餘兄弟馬鬣能爲  
謀烏口甯辭悴

吾宗荆湖始

唐荆湖統制文毅公諱振麟封中山湯氏中山郡所由始

代遠不可稽陌

橋舊廬墓

明季自常熟陌橋遷蘇州再遷常州

野草煙萋迷西瀛十三世子

姓百有奇力田僅數人豐歉恆苦飢無田去家易在家更  
無依吾子燕許才夕爲公卿知書局輒隨身三長寶其推  
家乘富文翰筆削非子誰遠游懼中輟朝暮期來歸

明中奉大夫管宗伯誠齋

紹甯

先生神道碑書後示

### 公七世孫學潮

烈皇改元歲廷對四百人萬言摠誠悃誰非忠藎臣不幸  
厄陽九志節難同論中奉官南都梓宮首疏陳再疏請卹

謚殉國諸忠魂詔敕密如雨腕脫遺襁餒股肱亦喉舌出

入忘艱辛亦知燕巢幕講學猶殷勤修省回天災啟沃求

堯仁

公有請御經筵復日講及日食修省諸疏

國祚如累卵諫草嗟批鱗時方

迫刀俎誰惜蕪田園掃錢塞馬口

掃盡江南錢填塞馬口江南民謠謂馬士英

也去乃潔其身春燈黯灰燼梅嶺崇嶙峋王師勢破竹

天命邦維新龍城渺彈丸狗黨拜路塵啼號竄婦子匍匐

籍縉紳君家三鳳雛

鉉舉人鍾貢生錢廩生

更有兩弟昆

紹恂武進士紹恆

全家泣膏斧正氣浩凌雲誰令趙孤匿盡懾屠伯尊翻賴

廝養兒獲全襁褓孫

滋琪鉉之子僕童明高以己子易之育於楊氏

主恩既云報

奴子拚不存寶逃穴潛伏玉茁蘭滋根迄今縣弱縈累代

叨殊恩祠宇何巍峩牲醴何芳芬烝嘗逮賤隸

僕崔三從死隨公祀

忠義祠而董明高夫婦以觀摩動凡民時危見臣節始信

存孤功亦祀管氏家祠古所云我讀賜誠集掩卷爲聲吞念我總角友顯揚志未

伸蠅頭徇微祿龍腹傳高文公八世孫繩萊官舍山令梓公賜誠堂集三世結

交契公六世孫緘若官御史爲先王父友八世爲婚姻滋琪娶于楊蓋先太夫人曾祖姑矧

吾祖與父俎豆同君歆故老有餘痛成童已習聞大節德

彌著逸事久不湮煌煌神道碑燕許推青門邵長蘅撰觀題徧

寰宇小子嫌辭繁家聲幸勿墮心迹勉其敦從來忠孝後

無忝良難言

### 哭保緒卽自題雙笠孤笠圖

一笠飛上天一笠老江邊江流正無已山色故依然野鶴

知游處蒼松記別年笛聲聽不得深巷鎖寒烟

幕府悲秋日江亭望遠時雁回書不見君病我安知空谷  
牽蘿婢孤舟脫襪兒銅官三尺土未解乞銘辭

三十六閒鷗秦淮古渡頭思君空有夢老我竟無儔畫舫  
紅襟燕春燈紫綺裘雲烟消易盡何地獨埋愁

少小工遊戲魚鹽復綺羅畫眉矜落雁書練值籠鵝豈有  
才文武而終遇坎輒青瑣是何物豪氣使消磨

落日盧妃巷紅樓枕碧湍鶯花三易主琴鶴再休官漢水  
長流恨芸編劇囑肝定文慙後死老淚溢毫端

昔年觴咏地婦子亦徜徉月滿聞箏夜風迴撲棗廊道南  
燕棘枳硯北語蛩蛩雙笠空千古回頭幾斷腸

植名姪袁浦病歸

奉隱園詩集

卷二十四

三

獨客逢秋病金風刮面黃豈徒消髀肉久已斷離腸望汝  
騰騏驎生兒作鳳凰參苓從擲卻一笑引千觴

野望

荒村人不見但見釣船孤野水調琴筑秋林展畫圖漸欣  
烽火遠誰惜黍田蕪借問征南將工書露板無

題烟蘿子

我游窮五岳無處不尋芝何日落君手空山孤鶴知路從  
騎虎熟家自避秦辭只爲丹成晚風前雪滿髭

題畫

生計託烟水襟懷相與清買山多種樹閉戶獨聞鶯定有  
吟朋隔遙將略約橫桃源亦人世不過遠刀兵

賀侯青甫

雲松

查九峰

廷華

同時生孫

玉牙珠顆鬬崢嶸  
一月街塵賀客并  
共把詩歌當絃管  
頻將湯餅會耆英  
齊年瑜策宜千古  
並世臯夔屬兩生  
還與而翁同擊壤  
莫提戈戟老功名

成蘭生

世瑄

方伯瞻闈侍養圖

君抱濟世才  
出處端素履  
政譜遺南陽  
家聲盛前史  
銜

命出九重捧輿越  
千里康強天所錫  
茲孝人爭企人憂

簪紱拘君喜林泉美

瘡藻輝星辰  
繁花燦羅綺  
撰杖翠

微顛奉觴白雲裏  
烹鮮潔膳適口非  
鮮比娛親在德業

豈惟重甘旨  
君爲萬民母  
侍母猶孺子  
宮錦舞嫺嫺  
慈顏

常莞爾  
蘭桂何森森  
晨昏頷而已  
起居極殊榮  
仁壽徵蕃

社誰無白髮親辛勤紛負米三釜逮親存眼中歎無幾祿  
養及于鍾世不數屈指亦有萬石家迎養都亭止獨行本  
淵源君先公以孝行著格天方致是回首武林游披肝文酒始湖  
山共嘯歌翰墨惜臧否虹氣薄層霄淵襟浩無涖羣黎頌  
生佛異政傳馴雉一別三遷官十年再逢此壺漿從父老  
道路瞻行旅東南望澤殷重幸慈雲被草堂有鄭公增輝  
到荆杞幅巾亦時登美景呼浮蠃春輝駐尺縑聊奏雕蟲  
技雕蟲安足多因君不朽矣君身忠孝兼善博親心喜愛  
日方舒長陰陽資變理欲慰不匱衷甘泉壽于紀

焦山子香上人江樓讀書圖

江天渺無極陵谷慨全非仙佛隨波逝蛟龍破壁飛何時



樓閣現數月鯉鴻稀猶有精廬子書聲出翠微

焦山子庚子七月十

九日崩其半樓閣盡毀主僧墨溪子方外弟子久無書至

借老吾交久閒眠碧洞春千秋陪古鶴四海泣詩人

借庵上人

主焦山前年圓寂嘉慶初余守備潤州時舊交也翰墨君同癖烟霞孰與親江樓

三萬卷老此薜蘿身

琴隱園詩集卷二十四終

琴隱園詩集卷二十五

武進 湯貽汾 雨生

琴隱集

辛丑 年六十四

懷惠秋韶 兆王 孝廉

期君早著看花鞭幾日江樓望遠天知否邗江風雪裏夢  
魂尋到孝廉船

樽前得句更誰酬粉荔椒花歲又周十二古琴塵四壁隔  
林寒雀自啾啾

保緒寫生宗宋人句勒法有雀梅一紙句已而未設  
色周子堅得於廣陵重故人遺墨亟付裝池而使

予補成之

自有千秋業恆多未竟心  
豹皮嗟片紙駿骨幾知音  
悲樂花前夢東西枝上禽  
定文誰慰汝握管一哀吟

寄五弟博臣八弟厚齋時余不得歸里

屈指三萬里回頭六十年  
老來思縮地歸去若登天  
忠孝餘清白飢寒免過愆  
桑榆貪骨肉魂夢復君前

去年正月於隨園集同人爲新年團拜會會者十九人  
今復如之主人袁又村出游不預以詩寄懷

酒香飄落碧雲端如畫樓臺擁翠巒  
海內幾人同骨肉花

前一笑又團圓瓊林再占龍頭少

孫尹圃刺史重赴瓊林

洛社頻攀

驥尾難

戚子固年最少將之官直隸

偶爾新吟符古數平原選客漫同

觀

正多佳會趁芳辰老至唯於邱壑親五畝園亭詩酒國百  
年喬木古今人鏡中綺繡低徊影花底房櫳宛轉春風月  
期君好調護天涯珍重苦吟身

是會未至者三人侯青甫查九峯劉瀛客

看山偏少一枝藤坐有車公興始騰未必忘情花九徑如

何高臥閣三層

青園新營  
環勝閣

亭臺不數舊婆娑

名園

二老風流愛綺羅各有名園勝金谷

故應獨樂占春多

水繪園修禊圖爲范廉泉

仕義

明府題

王揚州後此游無擊鉢驚看散玉珠池水半消才子淚庭

花重認美人，唐名園荒草迷。詩境賢宰清風入，畫圖可惜平泉佳子弟。飄零今日滿江湖。

月坡雨村偕游益山探梅兼訪潘少白不值

彩筆重尋玉女題，五雲多處眾山低。半隄鶯語迎人滑，一霽梅花到眼齊。傾蓋交誰堅白首，下車揖儘誓丹雞。洞仙歌罷天風發，笑口何時更虎溪。

是日月坡有洞仙歌雨村和之

獨酌懷徐子容兼寄榆樓銅士

長亭七十五，執手復何因。念汝干戈際，憐予老病身。江寒三月雨，興發一壺春。雪上多高士，山谷句花前幾故人。

清明日潘少白諸任階平高式之承鉅張小山一桂

孫月坡釋受庵過集琴隱園式之先一日詩有勞

力江天好放晴句是日果晴欣然和之

我從謝病羈江城十年難得清明晴今春九陌一泥海六  
七十日長號屏忽驚翠柳拂朱檻粥香餠白宜招朋失喜  
曦光見樓角酒人一一歡相迎袖中新吟共欣賞如吹玉  
笛開青冥原來黑蜨畏騷客不用怪石鞭夷陵山家速客  
但菰韭座上況有餐霞僧新泉聊復淪紫笳脫粟豈必輸  
青精平生愛游愛良友偶逢同調成忘形潘郎頭白學逾  
富所交海內多豪英任公窮經樂新雨屈指濂洛同傳燈  
不才詎合虎皮坐春風不到朱光庭兩生故是蔣詡客再  
拜卻媿揚雄亭竹林高會值佳日祇談風月休談兵憑君  
痛飲竭滄海快劒不屑汗蛟鯨其愁白日空西傾出門又

聽林鳩鳴城南城北動秦越何況客迹眞浮萍梅花亂落  
留餘馨幾時高閣重來登一生能著幾緡屐莫嫌日日衝  
泥行

題東坡西湖麥嶺題名後

題云過麥嶺同游天竺楊傑張璠蘇軾王瑜凡十  
五字又西湖龍華寺題名元祐五年三月二日同  
游姓名亦此四人則此游蓋同日而龍華用筆肥  
滯非公所書按公於元祐四年七月守杭州游此  
時年五十五也

公五十四杭州遷我去杭日公游年

我五十五自杭告歸

龍華天竺

仙乎仙桃榔林中劇可憐公胡不歸坐無田我歸無田恃

有天所不如公筆如椽卽十五字千秋傳

題韓蘄王翠微亭題名

亭在西湖飛來峯半題云紹興十二年清涼居士  
韓世忠因過靈隱登覽形勝得舊基建新亭榜名  
翠微以爲游息之所待好事者三月五日男彥直

書

翠微游倦翠微歸

白門有一樣高亭峙翠微驢背不如江

上好飛來憶我肯來飛

題宋高宗賜韓蘄王敕

敕存吳中南禪寺僅餘十三字云虎皮橐鞬一副  
弓五張至可領也後有御押一字



幾人九錫拜恩專霹靂驚聞射石穿誰識弓藏山澤去蹇  
驢不用虎皮羈

題錢武肅王投告太湖水府龍簡

簡白金重一鎰高今尺六寸廣四寸上雲下水周  
以龍文中鐫正書十行百七十九字順治元年出  
於太湖包山之麓雍正以來簡經鎔燬拓本流傳  
絕少文云大道弟子天下都元帥尙父守中書令  
吳越國王錢鏐年七十七歲三月十六日生自統  
制三吳主臨吳越民安俗阜道泰時康市物平和  
遐邇清晏仰自蒼昊降祐大道垂恩今則特詣洞  
府名山徧投龍簡恭陳醺謝上答玄恩伏願合具

告祈兼乞鏐壬申行年四時履歷壽齡遐遠眼目  
光明國家興隆子孫繁盛志祈玄視允協投誠謹  
詣太湖水府金龍驛傳於吳越國蘇州府吳縣洞  
庭鄉東皋里太湖水府告文寶正三年歲在戊子  
三月丁未朔二十六日壬申投按兩浙金石志云  
投龍始見於唐趙居貞雲門山投龍文西湖龍井  
赤烏銀牌疑亦是舉陸劭文羅邇云唐岱嶽觀碑  
自顯慶至貞元敕使齋醮投龍二十餘度而元宗  
投龍瀑布石池見於顏魯公麻姑山仙壇記又咸  
淳臨安志稱元封三年創宮壇於大滌洞前爲投  
龍祈福之所則投龍祈福始於漢武吳主踵行之

自唐以還遂爲道家故事故簡稱大道弟子也蕭  
枚生令裕云金石萃編鴛鴦碑有大道弟子鄭仙  
芝考晉書王凝之傳王氏世事張氏五斗米道凝  
之尤篤孫恩之亂凝之不設備禱於靖室謂有大  
道鬼兵相助大道之名始見於此咸淳臨安志載  
王天柱觀記作於唐昭宗光化三年七月記末云  
虔仰神靈遵行大道又云大道真科是爲無化致  
一篇之中大道兩見斯其恢張道本崇尚元風有  
國之初卽昭虔懇也

唐綱解紐羣豪起寶正居然埒天子名山洞府徧投龍猶  
署頭銜無僭侈是時王年七十七逮事三朝李朱李

寶正三年

爲唐明宗 自從妖鳥靖雙戈倍徹虹光斗牛裏田漁家世  
天成三年 本寒賤鑲鼎銘鐘錦衣里五王繼祚食報豐功在東南保  
桑梓崇祠鐵券至今存恕死豈知王不死太湖水府神爲  
誰海龍乃向求餘粹壽齡遐遠家國興不信存亡神足恃  
功臣堂上五百人此簡不知誰撰擬壯日誅潮老媚湖大  
道原來用如此水生火滅一條龍不及鐵幢尙江渼江山  
雕麗今如故霸業雄圖東逝水三樓蜃幻寂邱墟帶礪傷  
心一彈指曩予橫槊錢唐江予嘗將杭州四營兵領錢唐水師每聞故老  
談興亡有龍不睡眞名王十三州郡作保障八九百載謳  
思長 聖朝清宴慶八方百靈效順海不揚鯨鯢何敢鼓  
蜚強德服豈在工祈禳

題畫

頭上松濤足底泉松閒草閣住詩仙不愁寂寞無儔侶有  
箇閒鷗略約邊  
南北東西四面風行人勞逸自然公尙嫌流水無情甚一  
例滔滔只想東

贈朱嶽雲道士卽書其集

築環爲堵月作牀石壇丹竈周松篁吟聲往往出金石綠  
鬢忽忽成清霜鶴心松骨餐霞子不愛雲霄愛煙水豈嫌  
天上少詩人便住赤城游戲耳青蛇出袖丹霞寒醉眼茫  
茫天海寬長鯨吐浪海壁立短髮衝落熊鬚冠一樣雲棲  
獨憂國狂歌痛飲無人識紛紛桃李笑春風旌節花殘誰

惜得雲軒風駟期相從世上是非雙耳聾  
留取靈臺一方血大羅去覓長生訣

題王樸山道士清涼山房遺稿

庭花半似爛樵柯舌本留甘記穆陀  
猶有陽都酒家女犢禪涇淚鬢雙皤

元真童子赤霜髭寂寞珠塵鶴守祠  
落翮山頭頻悵望玉臺誰領八霞司

充棟靈書脈望肥輸君遊戲石榴皮  
桂漿芝髓無窮味盡在清涼一卷詩

爲俞問樵寫問樵圖因題

問雲何處生問泉何處出問山何處深  
問廬何處結問仙

何處尋問芝何處掇咄爾奚問爲我樵俱不知一樵萬事  
畢天地無高卑雲泉亦身外況論仙與芝

白鷺洲過朱嶽雲枕江園讀其近詩漫題

飽我青精飯歌君白雪吟江天千里目邱壑百年心潔似  
浴波鷺清同語月琴鍊詩應有訣肯授半環金

不信逍遙谷還爲翰墨場但能詩是虎何用石成羊習靜  
長生訣安貧辟穀方蓬蒿等壺嶠碧落亦黃梁

吳越王金塗塔拓本爲馬藏山題

陰有文云吳越國王錢宏俶敬造八萬四千寶塔  
乙卯歲記四面佛像

錢王十萬塔日本界五百乃言八萬四數若自掩匿其歲

紀乙卯不書周顯德國王宏俶造十九字深刻范銅六寸

高修羅飾金碧乃有尼毘王割肉飼白額然燈截雙耳有

佛名慈力薩埵與月光捨身不自惜又有八金剛執杵岸

其幘不信鐵輪椎鬼神俯受役入萬四千塔舉念卽時得

錢王一效擲千古詫奇特西湖一髮塔六百萬緡易倣建

塔藏佛髻髮費六百萬緡詳自譏碑記度此更不貲厚斂歸輕擲故應大布

施不吝傾家國入九百年中嗜古幾同癖石帚慈山僧珍

藏傳載藉顧豹爾陳默朱石毛子摩挲等銅狄竹垞述

所聞漁洋思未覲流傳今益少拓本亦難覓藏山遊洛陽

歸裝頗增色斗室放光明金身列千億昨歲過錢唐此圖

復巧獲重錦愛護深焚香瞻禮亟知君重文字匪佞優婆



寒不妨豪奪人肯示苦吟客呼予沐手前爲汝題詩側鐵  
幢不可稽銀簡亦無迹賴此一片銅傳茲數行墨東南保  
障功于焉重追憶五季紛戰爭十國多凶逆寶鼎與金甌  
誰保終完壁

題崇化寺西塔基碑

在蕭山縣今名祇園寺東塔巍然無恙文云吳越  
王長舅鄭國公吳延福載興埒塔二所香泥木石  
爲此鎡基厚二丈餘其固若山他日製爲請無疑  
也唐下元戊午年七月二十八日勾當并結塔僧  
契莊勸緣僧延祝按戊午實周顯德五年延福錢  
唐人官甯國軍節度使與吳越王錢俶母

名漢月  
謚恭懿

同爲中直指揮使吳珂所生

崇化寺塔有古銘吳越長舅延福興香泥木石二丈增其  
固若山戊午成契莊延祝同列名結塔勸緣此二僧書唐

下元削顯德似惡中原尊篡逆一朝節度乃見收倉卒兵

戈圍第宅或告延福有異圖俶遺內牙指揮使薛溫以兵

先夫人之同氣也教安忍寅法五人眾欲殺之俶流涕曰

皆除名徙諸州見續通鑑長編智慧原來數巾幘此時佛

力知無力俶母性慈謙而節儉諸吳每有遷授皆峻阻之

安寶叔還傳八會圖君家兄弟嗤何益趙寬夫子西湖寶

造塔殘記審爲吳延爽所作文云爽爲都此山上承角亢

又云第一級圖八會功德像吳越備史武肅建八會亭以

不哭定越講武計議凡八黃妃六百萬緡錢俶建黃妃塔

會於此蓋像所出名也千餘人皆大哭曰

萬金塗八萬又四千千人一慟悲禮賢

俶上表納土從者

吾王不歸矣見吳越備史宋建離宮于薰風門外名禮賢宅俶納土後賜之見玉壺清話  
雲煙君不見黔髡盜販王侯貴延福無非福自延

題建昭雁足鐙

文曰建昭三年考工工輔爲內者造銅雁足鐙重  
三斤八兩護建佐博嗇夫福掾光主右丞宮令相  
省中宮內者第五故家凡四十有五言在盤下又  
今陽平家畫一至三陽朔元年賜十有三言在脣  
後大廚三言在趾下蓋建昭時製陽朔時賜陽平  
侯王氏物也

擁髻長門永夜歎承恩合展寸心丹五侯勢燄輕煙滅鴻  
爪猶畱冷眼看

嗜古難忘三泖叟一時博物最風流九龍五鳳繁華盡卻

作漁燈照白頭

乾隆間燈爲王述庵侍郎物述庵有三泖漁莊圖

賈丹生

輝山

明府罷權邳州卽送還厯下

厯下多名士逢君最出塵一官輕去住兩世重緣因

族姪敏中

兄子綬名皆與君有綢繆之雅心迹明湖水虛懷圯上人驅歌容易發又

見柳條新

卽事

何處青山挂酒瓢屢屢炊盡市煙消船頭牽纜長江舶牀  
下掀波大海潮簫管齊停鶯燕散兵戈不洗蜃魚驕天吳  
豈是無知識忍見哀鴻亂葉飄

水仙歌罷咏滄浪鼠解巢林蟻上牆犬馬也貪乾淨土江

湖翻作太平鄉葵難衛足猶思日菊已傷根那傲霜繞屋  
花枝都染淚拂雲空費十年忙

題子湘湖亭詩卷兼懷卷中諸子於杭州

秋水碧羅羅樓臺笑語多直將湖上月換取醉時歌回首  
十年別相思兩鬢皤莫愁同激灩能否鷺鷥過

題西河竹垞兩先生合璧小象

萬里蠻荒識姓名

西河自署櫪軒千秋經術留天地萬里蠻荒識姓名有琉球使者過杭覓瀨中

集訪見

春江鷺鴨費評論

汪蛟門誦東坡春江水暖鴨先知何尊

鳴也曼殊不得專房寵誰識君詩獺祭成

夫人陳以先生寵妾曼殊故輒

毀之千人曰爾輩以毛大可爲博學邪渠作七言八句亦必獺祭乃成

至今長水說南宗豆粥敲門遇亦窮

竹垞居節廉橋時值歲凶比鄰訝其日午

無炊煙餽以豆粥先生以奉  
一安度先生而自忍飢讀書  
一代風騷歸玉尺論詩端比

釋經工先生輯明詩綜附靜志居詩話持論最允

一老扶藜一幅巾風流都是玉堂人此中只算同年會莫

厭清泉地主貧兩先生同舉康熙十八年宏博

題張夢緹縉英女甥淡菊軒詩

落落湘弦太古聲閨中博士舊知名奇書那是今生讀好  
句都如夙世成敢有鬚眉爭不朽直如冰玉與同清更知  
菊澹輸人澹歷盡艱辛意氣平

原來詩虎是鍼神姓氏都應達紫宸相敬如賓天上宿

夫吳廷珍刑部郎一塵不染月中人吟毫但見揮珠玉病骨誰知

困米薪一代風騷兼弟妹奇才自古出清貧妹婉紉若綺弟仲遠皆工

琴隱園詩集卷二十一  
詩詞

寄汪又村

近孫

郊祁當日擅風流

又村兄卽小米舍人

畫舫恆同聽石州雅集圖傳

湖海氣名山業抱古今愁花驄尙憶城西柳詩夢難尋水

北鷗博得古人常在眼十行醉墨管公樓

時以朱絲箋屬書近作

寄懷汪少海時宰餘姚海氛日逼

當代數英豪君才著六韜江山餘虎口骨肉棄鴻毛邑小

愁增竈民泣悔賣刀論功應上賞枹鼓看親操

琴隱園詩集卷二十一終